

ETXARRI ARANATZ NABAI ETA BILDU TALDEEN MOZIOA

Hainbat komunikabidek sustatutako kanpaina mediatikoaren ondoren, Alderdi Popularrak Sakanako udalen jarduera kriminalizatzea eta hura baldintzatzea helburu duen estrategia garatu du, betiere oportunismo politikotik eta guztiz alderdikoia den jarrera batetik abiatuta. Hala, azken hilabete hauetan ildo horretako hainbat jarduketaren lekuko izan gara, eta beste behin ere argi geratu da haien helburu bakarra dela nabarmen gelditzea eta protagonismoa bilatzea, horretarako Sakana erabiliz eta, kasu honetan, Etxarri Aranazko herria erabiliz.

Mozio horren bitartez, berriz ere, Alderdi Popularra kezko hesi bat sortzen ahalegintzen ari da bere miseriak eta ustelkeriak estaltzeko. Era berean, beste erantzukizun larri batzuk ezkutatu nahi ditu: egungo egoera ekonomikoari aurre egiteko gaitasun eza eta beren kudeaketa txarrak eta etengabean inposatutako murrizketek nafar guztiongan eragin duten haserre.

PPk ez du parte hartzen ez udal jardueran, ez Etxarri Aranazko herritarren eguneroko gaien kudeaketan. Aldiz, egoera puntual batzuk baliatzen ditu protagonismoa bilatzeko eta nabarmen gelditzeko, baina, hori bai, bizitzen ari garen egoera politikoaren azterketa sakona egin gabe eta gatazkari irtenbidea bilatzeko inplikatu gabe, nahiz eta haren irtenbidea bilatzeko guztion konpromisoa beharrezkoa den.

Gutxi batzuek egoera zein den ikusi nahi ez duten arren, herri honetako gehiengo politiko eta sozialak jakin badaki une honetan beste fase batean gaudela, eta beste fase horretan ezinbestekoa dela gatazkaren ondorioei aurre egitea eta gainditzea, bai eta normalizazio politikoaren alde lan egitea ere.

Testuinguru horretan, presoak jasaten ari diren sakabanaketa eta horrek familiarrei eta gertukoei dakarkien zigor erantsia agerikoa den zerbait da, eta Etxarri Aranazko eta Euskal Herriko herritarrek behin baino gehiagotan salatu eta harekin bukatzeko eskatu dute.

Presoen sakabanaketarengatik familiar bat bisitatzeko batez beste familia bakoitzak egin behar duen kilometro kopurua astean 1.223 kilometrokoa da, hilabetean 5.300 kilometrokoa eta 63.600 kilometrokoa urtean.

Bestalde, familia bakoitzaren batez besteko gastua astean 380 eurokoa da, hilabetean 1.640 eurokoa eta urtean 19.653koa. Zifra horiek sakabanaketa

politika hasi denetik pasatu diren urte guztiengatik biderkatuz gero, gastu ekonomikoa itzela izan dela argi ikusten da.

Presoen familiei ezarritako zigor erantsi hori PPk garatutako sakabanaketak eragiten du, mendekuan du oinarria eta muturreko egoerak eragiten ditu.

Presoak eta familiakoak zigortzeko politika horrek Etxarri Aranatzeko eredu eragina, gure herrian sei lagun baitaude preso herritik ehunka kilometrotara.

Gauzak horrela, PPk aurkeztutako mozioa guztiz faltsua den oinarritik abiatu da, eta faltsukeria horretatik gezur handi bat eraiki du, presoen sakabanaketaren ondorioak pairatzen dituzten familiarren eta gertukoak kriminalizatzen dituen.

Mozioa aurkezteko PPk aipatzen duen idazkiaren edukia eta mozioaren edukia eta ondorioak guztiz kontrakoak dira. Nahiz eta PPk “talde terroristako presoendako” dirua eskatzeko gutun bat bidali zela dioen eta “talde armatuko kide izateagatik preso dauden terroristen aldeko ekintza”tzat hartzen dituen, errealitatea guztiz bestelakoa da. Horrela, kontuan hartuta sakabanaketak beren sorterritik ehunka kilometrotara preso daudenen familiakoei eta gertukoiei kalte ekonomikoa eragiten diela, herri ekimenaren asmoa zen seme-alabak, neba-arrebak... bisitatzeko milaka kilometro egin behar horrek dakarren gastu itzela arintzea, neurri txiki batean bada ere.

Hala, guztiz interesatua den PPren manipulazioa eta faltsukeria PPko ordezkariaren fede txarretik eta protagonista izateko eta bere burua nabarmentzeko duen gogo itzeletik baino ezin dira ulertu, eta horretarako Etxarri Aranazko Udalez eta herriaz baliatu da. Uste dugu gaur egungo egoera politikoan PPk ez duela inolako zilegitasunik inori ezer eskatzeko.

Gauzak horrela, Etxarri Aranazko Udalak erabaki du:

PPk Etxarri Aranatzeko duen ordezkariaren jarrera salatzea, Etxarri Aranazko presoekiko eta haien familiekiko eta gertuekiko elkartasuna adieraztea helburu duten ekimenak kriminalizatu baititu, horretarako faltsukeriak eta manipulazioa erabiliz.

Etxarri Aranatz, 2014ko urtarrila

